

四庫全書

史部



欽定四庫全書

史部

通志卷一百七上

詳校官編修<sub>臣</sub>李潢

編修<sub>臣</sub>裴謙覆勘

覆校官助教<sub>臣</sub>金學詩

校對官助教<sub>臣</sub>汪錫魁

謄錄監生<sub>臣</sub>鄭嶠



欽定四庫全書

通志卷一百七上

宋右廸功郎鄭樵漁仲撰

列傳第二十上

後漢

卓茂魯恭弟魏霸弟劉寬子伏湛子侯霸韓宋

弘則蔡茂那馮勤賀趙喜牟融韋彪族子義弟義弟義

宣秉張湛王丹王良杜林郭丹范吳



良承宮 鄭均 趙典典兄子謙 桓譚 馮衍

子豹申屠剛 鮑永昱 郅惲子壽 蘇竟 楊厚 郎顗

宗襄楷 郭伋 杜詩 孔奮 張堪 廉范

王堂 蘇章族孫不韋 羊續 賈琮 陸康

卓茂字子康南陽宛人也父祖皆至郡守茂元帝時學於長安事博士江生習詩禮及歷筭究極師法稱為通儒性寬仁恭愛鄉黨故舊雖行能與茂不同而皆愛慕欣欣焉初辟丞相府史事孔光光稱為長者時嘗出行



有人認其馬茂問曰子亡馬幾何時對曰月餘日矣茂  
有馬數年心知其謬嘿解與之挽車去顧曰若非公馬  
幸至丞相府歸我他日馬主別得亡者乃詣府送馬叩  
頭謝之茂性不好爭如此後以儒術舉為侍郎給事黃  
門遷密令勞心諄諄視民如子舉善而教口無惡言吏  
民親愛之而不忍欺之人嘗有言部亭長受其米肉遺  
者茂辟左右問之曰亭長為從汝求乎為汝有事囑之  
而受乎將平居自以恩意遺之乎人曰往遺之耳茂曰



遺之而受何故言邪人曰竊聞賢明之君使人不畏吏吏不取人今我畏吏是以遺之吏既卒受故來言耳茂曰汝為敝人矣凡人所以貴於禽獸者以有仁愛知相敬事也今鄰里長老尚致饋遺此乃人道所以相親況吏與民乎吏顧不當乘威力彊請求耳凡人之生羣居雜處故有經紀禮義以相交接汝獨不欲修之寧能高飛遠走不在人間邪亭長素善吏歲時遺之禮也人曰苟如此律何故禁之茂笑曰律設大法禮順人情今我



以禮教汝汝必無怨惡以律治汝何所措手足乎一門之內小者可論大者可殺也且歸念之於是人納其訓吏懷其恩初密到縣有所廢置吏民笑之鄰城聞者皆嗤其不能河南郡為置守令茂不為嫌理事自若數年教化大行道不拾遺平帝時天下大蝗河南二十餘縣皆被其災獨不入密縣界督郵言之太守不信自出案行見乃服焉是時王莽秉政置大司農六部丞勸課農桑遷茂為京部丞密人老幼皆涕泣隨送及莽居攝以



病免歸郡常為門下掾祭酒不肯作職吏更始立以茂為侍中祭酒從至長安更始政亂以年老乞骸骨歸時光武初即位先訪求茂茂詣河陽謁見乃下詔曰前密令卓茂束身自修執節淳固誠能為人所不能為夫名冠天下當受天下重賞故武王誅紂封比干之墓式商容之間今以茂為太傅封褒德侯食邑二千戶賜几杖車馬衣一襲絮五百斤以茂長子戎為太中大夫次子崇為中郎給事黃門建武四年薨賜棺槨冢地車駕素



服親臨送葬子崇嗣徙封沅鄉侯官至大司農崇卒子  
楚嗣楚卒子訢嗣訢卒子隆嗣永元十五年隆卒無子  
國除初茂與同郡孔休陳留蔡勲安衆劉宣楚國龔勝  
上黨鮑宣六人同志不仕王莽時並名重當時休字子  
泉哀帝初守新都令後王莽秉權休去官歸家及莽篡  
位遣使齎元纁束帛請為國師遂歐血託病杜門自絕  
光武即位求休勲子孫賜穀以旌顯之劉宣字子高安  
衆侯崇之從弟知王莽當篡乃變姓名抱經書隱避林



數建武初乃出光武以宣襲封安衆侯擢勝子賜為上谷太守勝鮑宣事在前史勲事在元孫邕傳

魯恭字仲康扶風平陵人也其先出於魯頃公為楚所滅遷於下邑因氏焉世吏二千石哀平閒自魯而徙大父匡王莽時為義和有權數號曰智囊父某建武初為武陵太守卒官時恭年十二弟丕七歲晝夜號踊不絕聲郡中賻贈無所受乃歸服喪禮過成人年十五與母及丕俱居太學習魯詩閉戶講誦絕人間事兄弟俱為



諸儒所稱學士爭歸之太尉趙熹慕其志每歲時遣子  
問以酒糧皆辭不受恭憐丕小欲先就其名託疾不仕  
郡數以禮請謝不肯應母彊遣之恭不得已而西因留  
新豐教授不行及丕舉方正恭乃始為郡吏太傅趙熹  
聞而辟之肅宗集諸儒於白虎觀恭特以經明得召與  
其議熹復舉恭直言待詔公車拜中牟令專以德化為  
理不任刑罰訟人許伯等爭田累守令不能決恭為平  
理曲直皆退而自責輟耕相讓亭長從人借牛而不肯



還牛主訟于恭恭召亭長勅令歸牛者再三猶不從恭  
歎曰是教化不行也欲解印綬去掾史涕泣共留之亭  
長乃慙悔還牛詣獄受罪恭貫不問於是吏民信服建  
初七年郡國螟傷稼犬牙緣界不入中牟河南尹袁安  
聞之疑不實使仁恕掾肥親往廉之恭隨行阡陌俱坐  
桑下有雉過止其傍傍有兒童親曰兒何不捕之兒言  
雉方將雛親瞿然而起與恭訣曰所以來者欲察君之  
政迹耳今蟲不犯境此一異也化及鳥獸此二異也豎



子有仁心此三異也久留徒擾賢者耳還府具以狀白  
安是歲嘉禾生恭便坐廷中安因上書言狀帝異之會  
詔百官舉賢良方正恭薦中牟名士王方帝即徵方詣  
公車禮之與公卿所舉同方致位侍中恭在事三年州  
舉尤異會遭母喪去官吏民思之後拜侍御史和帝初  
立議遣車騎將軍竇憲與征西將軍耿秉擊匈奴恭上  
疏諫曰陛下親勞聖思憂在軍役誠欲以安定北垂為  
人除患定萬世之計也臣伏獨思之未見其便社稷之



計萬人之命在於一舉數年以來秋稼不熟人食不足  
倉庫空虛國無蓄積會新遭大憂人懷恐懼陛下躬大  
聖之德履至孝之行盡諒陰三年聽於冢宰百姓闕然  
三時不聞警蹕之音莫不懷思皇皇若有求而不得今  
乃以盛春之月興發軍役擾動天下以事戎夷誠非所  
以垂恩中國改元正時由內及外者也萬民者天之所  
生天愛其所生猶父母愛其子一物有不得其所者則  
天氣為之舛錯況於人乎故愛人者必有天報昔太王



重人命而去邠故獲上天之祐夫戎狄者四方之異氣也蹲夷踞肆與鳥獸無別若雜居中國則錯亂天氣汙辱善人是以聖王之制羈縻不絕而已今邊境無事宜當修仁行義尚於無為令家給人足安業樂產夫人道安於下則陰陽和於上祥風時雨覆被遠方夷狄重譯而至矣易曰有孚盈缶終來有他吉言甘雨滿我之缶誠來有我而吉已夫以德勝人者昌以力勝人者亡今匈奴新為鮮卑所殺遠歲於史侯河西去塞數千里而



欲乘其虛耗利其微弱是非義之所出也前太僕祭彤  
遠出塞外卒不見一胡而兵已困矣白山之難不絕如  
縆都護陷沒士卒死者如積迄今被其辜毒孤寡哀思  
之心未弭仁者念之以為累息奈何復欲襲其迹不顧  
患難乎今始徵發而大司農調度不足使者在道分部  
督趣上下相迫民間之急亦已甚矣三輔并涼少雨麥  
根枯焦牛死日甚此其不合天心之效也羣僚百姓咸  
曰不可陛下獨奈何以一人之計棄萬人之命不恤其



言乎上觀天心下察人志足以知事之得失臣恐中國  
不為中國豈徒匈奴而已哉惟陛下留聖恩休罷士卒  
以順天心書奏不從每政事有益於人恭輒言其便無  
所隱諱其後拜為魯詩博士由是家法學者日盛遷侍  
中數召讌見問以得失賞賜恩禮寵異焉遷樂安相是  
時東州多盜賊羣輩攻劫諸郡患之恭到重購賞開恩  
信其渠帥張漢等率支黨降恭上以漢補博昌尉其餘  
遂自相捕擊盡破平之州郡以安永元九年徵拜議郎



八月飲酎齋會章臺詔使小黄門特引恭前其夜拜侍  
中勅使陪乘勞問甚渥冬遷光祿勳選舉清平京師貴  
戚莫能枉其正十二年代呂蓋為司徒十五年從巡狩  
南陽除子撫為郎中賜駙馬從駕時弟丕亦為侍中兄  
弟父子並列朝廷後坐事策免殤帝即位以恭為長樂  
衛尉永初元年復代梁鮪為司徒初和帝末下令麥秋  
得案驗薄刑而州郡好以苛察為政因此盛夏斷獄恭  
上疏諫曰臣伏見詔書敬若天時憂念萬民為崇和氣



罪非殊死且勿案驗進柔良退貪殘奉時令所以助仁  
德順昊天致和氣利黎民者也舊制至立秋乃行薄刑  
自永元十五年以來改用孟夏而刺史太守不深惟憂  
民息事之原進良退殘之化因以盛夏徵召農人拘對  
考驗連滯無已司隸典司四方京師四方是則而近於  
春月分行諸部託言勞來貧人而無惻隱之實煩擾郡  
縣廉考非急逮捕一人罪延十數上逆時氣下傷農業  
案易五月始用事經曰后以施令誥四方言君以夏至



之日施命令止四方行者所以助為陰也行者尚止之  
况於逮召考掠奪其時哉比年水旱傷稼人飢流冗今  
始夏百穀權興陽氣胎養之時自三月以來陰寒不暖  
物當化變而不被和氣月令孟夏斷薄刑出輕繫行秋  
令則苦雨數來五穀不熟又曰仲夏挺重囚益其食行  
秋令則草木零落人傷於疫夫斷薄刑者謂其輕罪已  
正不欲令久繫故時斷之也臣愚以為今孟夏之制可  
從此令其決獄案考皆以立秋為斷以順時節育成萬



物則天地以和刑罰以清矣初肅宗時斷獄皆以冬至之前自後論者互多駁異鄧太后詔公卿以下會議恭議奏曰夫陰陽之氣相扶而行發動用事各有時節若不當其時則物隨而傷王者雖質文不同而茲道無變四時之政行之若一月令周世所造而所據皆夏之時也其變者唯正朔服色犧牲徽號器械而已故曰殷因於夏禮周因於殷禮所損益可知也易曰潛龍勿用言十一月十二月陽氣潛藏未得用事雖煦噓萬物養其



根芽而猶盛陰在上地凍水冰陽氣否隔閉而成冬故  
曰履霜堅冰陰始凝也馴致其道至堅冰也言五月微  
陰始起至十一月堅冰至也夫王者之作因時為法孝  
章皇帝深惟古人之道助三正之微定律著令冀承天  
心順物性命以致時雍然從變改以來年歲不熟穀價  
常貴人不寧安小吏不與國同心者率入十一月得死  
罪賊不問曲直便即格殺雖有疑罪不復讞正一夫吁  
嗟王道為虧況於衆乎易十二月君子以議獄緩死可



令疑罪大辟之科盡冬月乃斷其立春在十二月中者勿以報囚如故事後卒施行恭再在公位選辟高第至列卿郡守者數十人而其耆舊大姓或不蒙薦舉至有怨望者恭聞之曰學之不講是吾憂也諸生不有鄉舉者乎終無所言恭性謙退奏議依經潛有補益然終不自顯故不以剛直為稱三年以老病策罷六年年八十一卒於家以兩子為郎長子謙為隴西太守有名績謙子旭官至太僕從獻帝西入關與司徒王允同謀共誅



董卓及李傕入長安旭與允俱遇害恭弟丕字叔陵性沈深好學孳孳不倦遂杜絕交游不答侯問之禮士友常以此短之而丕欣然自得遂兼通五經以魯詩尚書教授為當世名儒後歸郡為督郵功曹所事之將無不以師友待之建初元年肅宗詔舉賢良方正大司農劉寬舉丕時對策者百有餘人唯丕在高第除為郎遷新野令視事暮年州課第一擢拜青州刺史務在表賢明慎刑罰七年坐事下獄司寇論元和元年徵再遷拜趙



相門生就學者常百餘人關東號之曰五經復興魯叔陵趙王商嘗欲避疾便時移住學官丕止不聽王乃上疏自言詔書下丕奏曰臣聞禮諸侯薨於路寢大夫卒於嫡室死生有命未有逃避之典也學官傳五帝之道脩先王禮樂教化之慶王欲廢塞以廣游讌事不可聽詔從丕言王以此憚之其後帝巡狩之趙特被引見難問經傳厚加賞賜在職六年嘉瑞屢降吏民重之永元二年遷東郡太守丕在二郡為人修通溉灌百姓殷



富數薦達幽隱名士明年拜陳留太守視事三暮後坐廩貧人不實徵司寇論十一年復徵再遷中散大夫時侍中賈逵薦丕道藝深明宜加任用和帝因朝會召見諸儒丕與侍中賈逵尚書令黃香等相難數事帝善丕說罷朝特賜冠幘履襪衣一襲丕因上疏曰臣聞說經者傳先師之言非從己出不得相讓則道不明若規矩權衡之不可枉也難者必明其據說者務立其義浮華無用之言不陳於前故精思不勞而道術愈章法異者



各令自說師法博觀其義覽詩人之旨意察雅頌之終  
始明舜禹臯陶之相戒顯周公箕子之所陳觀乎人文  
以化天下陛下既廣納謇謇以開四聰無令芻蕘以言  
得罪既顯巖穴以求仁賢無使幽遠獨有遺失十二年  
遷為侍中免永初二年詔公卿舉儒術篤學者大將軍  
鄧騭舉不再遷復為侍中左中郎將再為三老五年年  
七十五卒於官

魏霸字喬卿濟陰句陽人也世有禮義霸少喪親兄弟



同居州里慕其雍和建初中舉孝廉八遷和帝時為鉅鹿太守以簡朴寬恕為政掾史有過要先誨其失不改者乃罷之吏或相毀訴霸輒稱他吏之長終不及人短言者懷慙譖訟遂息永元十六年徵拜將作大匠明年和帝崩典作順陵時盛冬地凍中使督促數罰縣吏以厲霸霸撫循而已初不切責而反勞之曰今諸卿被辱大匠過也吏皆懷恩力作倍功延平元年代尹勤為太常明年以病致仕為光祿大夫永初五年拜長樂衛尉



以病乞身復為光祿大夫卒於官

劉寬字文饒弘農華陰人也父崎順帝時為司徒寬嘗行有人失牛者乃就寬車中認之寬無所言下駕步歸有頃認者得牛而送還叩頭謝曰慙負長者隨所刑罪寬曰物有相類事容脫誤幸勞見歸何為謝之州里服其不校桓帝時大將軍辟五遷司徒長史時京師地震特見詢問再遷出為東海相延熹八年徵拜尚書令遷南陽太守典歷三郡溫仁多恕雖在倉卒未嘗疾言遽



色常以為齊之以刑民免而無恥吏人有過但用蒲鞭  
罰之示辱而已終不加苦事有功善推之自下災異或  
見引躬克責每行縣止息亭傳輒引學官祭酒及處士  
諸生執經對講見父老慰以農里之言少年勉以孝悌  
之訓民感德興行日有所化靈帝初徵拜太中大夫侍  
講華光殿遷侍中賜衣一襲轉屯騎校尉遷宗正轉光  
祿勳嘉平五年代許訓為太尉靈帝頗好學藝每引見  
寬常令講經寬嘗於坐被酒睡伏帝問太尉醉邪寬仰



對曰臣不敢醉但任重責大憂心如醉帝重其言寬簡  
略嗜酒不好盥浴京師以為諺常坐客遣蒼頭市酒迂  
久大醉而還

迂久猶良久也

客不堪之罵曰畜產寬須臾遣人

視奴疑必自殺顧左右曰此人也罵言畜產辱孰甚焉  
故吾懼其死也夫人欲試寬令恚伺寬當朝會裝嚴已  
訖使侍婢奉肉羹翻汙朝衣婢遽收之寬神色不異乃  
徐言曰羹爛汝手其性度如此海內稱為長者後以日  
食策免拜衛尉光和三年復代段熲為太尉在職三年



以日食免又拜永樂少府遷光祿勳以先策黃巾逆謀  
以事上聞封遂鄉侯六百戶中平三年卒年六十六贈  
車騎將軍印綬位特進諡昭烈侯子松嗣官至宗正

伏湛字惠公瑯邪東武人也九世祖勝字子賤所謂濟  
南伏生者也湛高祖父孺武帝時客授東武因家焉父  
理為當世名儒以詩授成帝為高密太傅別自名學湛  
性孝友少傳父業教授數百人成帝時以父任為博士  
弟子五遷至王莽時為繡衣執法使督大姦遷後隊屬



正更始立以為平原太守時倉卒兵起天下驚擾湛獨晏然教授不廢謂妻子曰夫一穀不登國君徹膳今民皆飢奈何獨飽乃共食麤糲分俸祿以賑鄉里來客者百餘家時門下督素有氣力謀欲為湛起兵湛惡其惑衆即收斬之徇首城郭以示百姓於是吏民信向郡內以安平原一境湛所全也光武即位知湛名儒舊臣欲令幹任內職徵拜尚書使典定舊制時大司徒鄧禹西征關中帝以湛才任宰相拜為司直行大司徒事車駕



每出征伐常留鎮守總攝羣司建武三年遂代鄧禹為  
大司徒封陽都侯時彭寵反於漁陽帝欲自征之湛上  
疏諫曰臣聞文王受命而征伐五國必先詢之同姓然  
後謀於羣臣加占蓍龜以定行事故謀則成卜則吉戰  
則勝其詩曰帝謂文王詢爾仇方同爾兄弟以爾鉤援  
與爾臨衝以伐崇墉崇國城守先退後伐所以重人命  
俟時而動故三分天下而有其二陛下承大亂之極受  
命而帝興明祖宗出入四年而滅檀鄉制五校降銅馬



破赤眉誅鄧奉之屬不為無功今京師空匱資用不足  
未能服近而先事邊外且漁陽之地逼接北狄黠虜困  
逼必求其助又今所過縣邑尤為困乏種麥之家多在  
城郭聞官兵將至當已收之矣大軍遠涉二千餘里士  
馬罷勞轉糧艱阻今充豫青冀中國之都而寇賊縱橫  
未及從化漁陽以東本備邊塞地接外虜貢稅微薄安  
平之時尚資內郡況今荒耗豈足先圖而陛下捨近務  
遠棄易求難四方疑怪百姓怨懼誠臣之所惑也復願



遠覽文王重兵博謀近思征伐前後之宜顧問有司使  
極愚誠采其所長擇之聖慮以中土為憂念帝覽其奏  
竟不親征時賊徐異卿等萬餘人據富平連攻之不下  
唯云願降司徒伏公帝知湛為青徐所信向遣到平原  
異卿等即日歸降護送洛陽湛雖在倉卒必於文德以  
為禮樂政化之首顛沛猶不可違是歲奏行鄉飲酒禮  
遂施行之其冬車駕征張步留湛居守時烝祭高廟而  
河南尹司隸校尉於廟中爭論湛不舉奏坐策免六年



徙封不其侯邑三千六百戶遣就國後南陽太守杜詩  
上疏薦湛有柱石之姿宜居輔弼之位十三年夏徵勅  
尚書擇拜吏日及就位因讌見中暑病卒賜祕器帝親  
弔祠遣使者送喪脩冢二子隆翕翕嗣爵卒子光嗣光  
卒子晨嗣晨謙敬博愛好學尤篤以女孫為順帝貴人  
奉朝請位特進卒子無忌嗣亦傳家學博物多識順帝  
時為侍中屯騎校尉永和元年詔無忌與議郎黃景校  
定中書五經諸子百家藝術元嘉中桓帝復詔無忌與



黃景崔寔等共撰漢記又自采集古今刪著事要號曰  
伏侯注無忌卒子質嗣官至大司農質卒子完嗣尚桓  
帝女陽安公主女為孝獻皇后曹操殺后誅伏氏國除  
初自伏生已後世傳經學清靜無競故東州號為伏不  
鬪隆字伯文少以節操立名仕郡督郵建武二年詣懷  
宮光武甚親接之時張步兄弟各擁彊兵據有齊地拜  
隆為太中大夫持節使青徐二州招降郡國隆移檄告  
諭所部青徐羣盜得檄惶怖獲索賊右師郎等六校即



時皆降張步遣使隨隆詣闕上書獻鰣魚其冬拜隆光祿大夫復使於步并與新除青州牧守及都尉俱東詔隆輒拜令長以下隆招懷綏緝多來降附帝嘉其功比之酈生即拜步為東萊太守而劉永亦復遣使立步為齊王步貪受王爵兗豫未決隆曉譬曰高祖與天下約非劉氏不王今可得為十萬戶侯耳步欲留隆與其守二州隆不聽求得反命步遂執隆而受永封隆遣間使上書曰臣隆奉使無狀受執凶逆雖在困厄授命不顧



又吏民知步反叛心不附之願以時進兵無以臣隆為  
念臣隆得生到闕庭受誅有司此其大願若令歿身寇  
手以父母昆弟長累陛下陛下與皇后太子永享萬國  
與天無極帝得隆奏召父湛流涕以示之曰隆可謂有  
蘇武之節恨不且許而遽求還也其後步遂殺之時人  
莫不哀憐焉三年張步平車駕幸北海詔隆中弟咸收  
隆喪賜給棺斂太中大夫護送喪事詔告瑯邪作冢以  
子瑗為郎中



侯霸字君房河南密人也族父淵以官者有才辭任職  
元帝時佐石顯等領中書號曰太常侍成帝時任霸為  
太子舍人霸矜嚴有威容家累千金不事產業篤志好  
學師事九江太守房元治穀梁春秋為元都講王莽初  
五威司命陳崇舉霸德行遷隨宰縣界曠遠濱帶五湖  
而亡命者多為寇盜霸到即案誅豪猾分捕山賊縣中  
清靜再遷為執法刺姦糾案勢位者無所疑憚後為淮  
平大尹政理有能名及王莽之敗霸保固自守卒全一



郡及更始立遣使徵霸百姓老弱相攜號哭遮使者車或當道而卧皆曰願乞侯君復留暮年民至乃戒乳婦勿得舉子侯君當去必不能全使者慮霸就徵臨淮必亂不敢授璽書具以狀聞會更始敗道路不通建武四年光武徵霸與車駕會壽春拜尚書令時無故典朝廷又少舊臣霸明習故事收錄遺文條奏前世善政法度有益於時者皆施行之每春下寬大之詔奉四時之令皆霸所建也明年代伏湛為大司徒封關內侯在位明



察守正奉公不回十三年薨帝深傷惜之詔書悼惜於  
是追封謚霸則鄉哀侯食邑二千戶子昱嗣臨淮吏民  
共為立祠四時祭焉以沛郡太守韓歆代霸為大司徒  
歆字翁君南陽人以從征伐有功封扶陽侯好直言無  
隱諱帝每不能容嘗因朝會聞帝讀隗囂公孫述相與  
書歆曰亡國之君皆有才桀紂亦有才帝大怒以為激  
發歆又證歲將飢凶指天畫地言甚剛切坐免歸田里  
帝猶不懌復遣使宣詔責之司隸校尉鮑永固請不能



得歆及子嬰竟自殺歆素有重名死非其罪衆多不厭  
帝乃追賜錢穀以成禮葬之後子乘歐陽歆清河戴涉  
相代為大司徒坐事下獄死自是大臣難居相任其後  
河內蔡茂京兆玉况玉音魏郡馮勤皆得薨位况字文  
伯性聰敏為陳留太守以德行化人遷司徒四年薨昱  
後徙封於陵侯永平中兼太僕昱卒子建嗣建卒子昌

嗣

宋弘字仲子京兆長安人也父尚成帝時至少府哀帝



立以不附董賢違忤抵罪弘少而溫順哀平間作侍中  
王莽時為共工赤眉入長安遣使徵弘逼迫不得已行  
至渭橋自投於水家人救得出因佯死獲免光武即位  
徵拜太中大夫建武二年代王梁為大司空封栢邑侯  
所得租奉分贍九族家無資產以清行致稱徙封宣平  
侯帝嘗問弘通博之士弘乃薦沛國桓譚才學洽聞幾  
能及揚雄劉向父子於是召譚拜議郎給事中帝每譙  
輒令鼓琴好其繁聲弘聞之不悅悔於薦舉伺譚內出



正朝服坐府上遣吏召之譚至不與席而讓之曰吾所以薦子者欲令輔國家以道德也而今數進鄭聲以亂雅頌非忠正者也能自改邪將令相舉以法乎譚頓首辭謝良久乃遣之後大會羣臣帝使譚鼓琴譚見弘失其常度帝怪而問之弘乃離席免冠謝曰臣所以薦桓譚者望能以忠正輔主而令朝廷耽悅鄭聲臣之罪也帝改容謝使反其坐遂不復令譚給事中弘推進賢士馮翊桓梁三十餘人或相及為公卿者弘嘗譙見御座



新屏風圖畫列女帝數顧視之弘正容言曰未見好德  
如好色者帝即為撤之笑謂弘曰聞義則服可乎對曰  
陛下進德臣不勝其喜時帝姊湖陽公主新寡帝與其  
論朝臣微觀其意主曰宋公威容德器羣臣莫及帝曰  
方且圖之後弘被引見帝令主坐屏風後因謂弘曰諺  
言貴易交富易妻人情乎弘曰臣聞貧賤之知不可忘  
糟糠之妻不下堂帝顧謂主曰事不諧矣弘在位五年  
坐考上黨太守無所據免歸第數年卒無子國除弘弟



嵩以剛彊孝烈著名官至河南尹嵩子由章和間為太尉坐阿黨竇憲策免歸本郡自殺由二子漢登登在儒林傳漢字仲和以經行著名舉茂才四遷西河太守永建元年為東平相度遼將軍立名節以威恩著稱遷太僕上病自乞拜太中大夫卒策書慙惜令將相大夫會葬加賜錢十萬漢子則字元矩為鄢陵令亦有名迹拔同郡韋著扶風法真稱為知人則子年十歲與蒼頭共射弩蒼頭弦斷矢激誤中之即死奴叩頭就誅則察而



恕之潁川荀爽深以為美時人亦服焉

蔡茂字子禮河內懷人也哀平間以儒學顯徵試博士對策陳災異以高第擢拜議郎遷侍中遇王莽居攝以病自免不仕莽朝會天下擾亂茂素與竇融善因避難歸之融欲以為張掖太守固辭不就每所餉給計口取足而已後與融俱徵復拜議郎再遷廣漢太守有政績稱時陰氏賓客在郡界多犯吏禁茂輒糾案無所回避會洛陽令董宣舉糾湖陽公主帝始怒收宣既而赦之



茂嘉宣剛正欲令朝廷禁制貴戚乃上書曰臣聞興化致教必由進善康國寧人莫大理惡頃者貴戚椒房之家數因恩勢干犯吏禁殺人不死傷人不論臣恐繩墨棄而不用斧斤廢而不舉近湖陽公主奴殺人西市而與主共輿出入宮省逋罪積日寃魂不報洛陽令董宣直道不顧干主討姦陛下不先澄審召欲加箠當宣受怒之初京師側耳及其蒙宥天下拭目今者外戚驕逸賓客放濫宜勅有司按理姦罪使執平之吏永申其用



以厭遠近不緝之情光武納之建武二十年代戴涉為  
司徒在職清儉匪懈二十三年薨于位時年七十二賜  
東園梓棺賻贈甚厚茂初在廣漢亭坐大殿極上有三  
穗禾茂跳取之得其中穗輒復失之以問主簿郭賀賀  
離席慶曰大殿者官府之形象也極而有禾人臣之上  
祿也取中穗是中台之位也於字禾失為秩雖曰失之  
乃所以得祿秩也衮職有闕君其補之旬月而茂徵焉  
乃辟賀為掾賀字喬卿雒陽人祖父堅伯父游君並修



清節不仕王莽賀能明法累官建武中為尚書令在職  
六年曉習故事多所匡益拜荊州刺史引見賞賜恩寵  
隆異及到官有殊政百姓便之歌曰厥德仁明郭喬卿  
忠正朝廷上下平顯宗巡狩到南陽特見嗟歎賜以三  
公之服黼黻冕旒勅行部去襜帷使百姓見其容服以  
章有德每所經過吏民指以相示莫不榮之永平四年  
徵拜河南尹以清靜稱在官三年卒詔書愍惜賜車一  
乘錢四十萬



馮勤字偉伯魏郡繁陽人也曾祖父楊宣帝時為弘農太守有八子皆為二千石趙魏間榮之號曰萬石君焉兄弟形皆偉壯惟勤祖父偃長不滿七尺常自恥短陋恐子孫之似也乃為子伉娶長妻伉生勤長八尺三寸八歲善計初為太守鉅期功曹有高能稱期常從光武征伐政事一以委勤勤同縣馮巡等舉兵應光武謀未成而為豪右焦贛等所反勤乃率將老母兄弟及宗親歸期期悉以為腹心薦於光武初未被用後乃除為郎



中給事尚書以圖議軍糧在事精勤遂見親識每引見帝輒顧謂左右曰佳乎吏也由是使典諸侯封事勤量功次輕重國土遠近地勢豐薄不相踰越莫不厭服焉自是封爵之制非勤不定帝益以為能尚書衆事皆令總錄之司徒侯霸薦前梁令閻楊楊素有譏議帝常嫌之既見霸奏疑其有姦大怒賜霸璽書曰崇山幽都何可偶黃鉞一下無處所欲以身試法邪將殺身以成仁邪使勤奉策至司徒府勤還陳霸本意申釋事理帝意



稍解拜勤尚書僕射職事十五年以勤勞賜爵關內侯  
遷尚書令拜大司農三歲遷司徒先是三公多見罪退  
帝賢勤欲令以善自終乃因譙見從容戒之曰朱浮上  
不忠於君下陵轢同列竟以中傷至今死生吉凶未可  
知豈不惜哉人臣放逐受誅雖復追加賞賜賻祭不足  
以償不訾之身忠臣孝子覽照前世以為鏡誠能盡忠  
於國事君無二則爵賞光乎當世功名列於不朽可不  
勉哉勤愈恭約盡忠號稱任職勤母年八十每會見詔



勅勿拜令御者扶上殿謂諸王曰使勤貴寵者此母也  
其見親重如此中元元年薨帝悼惜之使者弔賜東園  
祕器賻贈有加勤七子長子宗嗣至張掖屬國都尉中  
子順尚平陽長公主終於大鴻臚建初八年以順中子  
奮襲主爵為平陽侯薨無子永元七年詔書復封奮兄  
羽林右監勁為平陽侯奉公主之嗣奮弟由黃門侍郎  
尚平安公主勁薨子邠嗣延光中為侍中薨子留嗣  
趙憙字伯陽南陽宛人也少有節操從兄為人所殺無



子憲年十五常思報之乃挾兵結客後遂往復仇而仇家皆疾病無相距者憲以因疾報殺非仁者心且釋之而去顧謂仇曰爾曹若健遠相避也仇皆卧自搏後病愈恚自縛詣憲憲不與相見後竟殺之更始立舞陰大姓李氏擁城不下更始遣柱天將軍李寶降之不肯云聞宛之趙氏有孤孫憲信義著聞願得降之更始乃徵憲憲年未二十既引見更始笑曰爾栗犢豈能負重致遠乎即除為郎中行偏將軍事使詣舞陰而李氏遂降



憲因進入潁川擊諸不下者歷汝南界還宛更始大悅  
謂憲曰卿名家駒努力勉之會王莽遣王尋王邑將兵  
出關更始拜憲為五威偏將軍使助諸將拒尋邑於昆  
陽光武破尋邑憲被創有戰勞還拜中郎將封勇功侯  
更始敗憲為赤眉所圍迫急乃踰屋亡走與所善友韓  
仲伯等數十人攜小弱越山阻徑出武關仲伯以婦色  
美慮有彊暴者而已受其害欲棄之於道憲責怒不聽  
因以泥塗仲伯婦面載以鹿車身自推之每道逢賊或



欲逼略憲輒言其病狀以此得免既入丹水遇更始親屬皆裸跣塗炭飢困不能前憲見之悲感所裝縑帛資糧悉以與之將護歸鄉里時鄧奉反於南陽憲素與奉善數貽書切責之而讒者因言憲與奉合謀帝以為疑及奉敗帝得憲書乃驚曰趙憲真長者也即徵憲引見賜鞍馬待詔公車時江南未賓道路不通以憲守簡陽侯相憲不肯受兵單車馳之簡陽吏民不欲內憲憲乃告譬呼城中大夫示以國家威信其帥即開門面縛自



歸由是諸營壁悉降荊州牧奏憲才任理劇詔以為平  
林侯相攻擊羣賊安集降附縣邑平定後拜懷令大姓  
李子春先為琅邪相豪猾兼并為人所患憲下車聞其  
二孫殺人事未發覺即窮詰其姦收子春二孫自殺京  
師為請者數十終不聽時趙王良疾病將終車駕親臨  
問王所欲言王曰素與李子春厚懷令趙憲欲殺之願  
乞其命帝曰吏奉法律不可枉也更道他所欲王無復  
言既薨帝追感趙王乃貫子春其年遷憲平原太守時



平原多盜賊憲與諸郡捕討其渠帥餘黨當坐者數千人憲上言惡惡止其身可一切徙京師近郡帝從之乃悉移置潁川陳留於是擢舉義行誅鋤姦惡後青州大蝗侵入平原界輒死歲屢有年百姓歌之二十六年帝延集內戚讌會歡甚諸夫人各各前言趙憲篤義多恩往遭赤眉出長安皆為憲所濟活帝甚嘉之後徵憲入為太僕引見謂曰卿非但為英雄所保也婦人亦懷卿之恩厚加賞賜二十七年拜太尉賜爵關內侯時南單



于稱臣烏桓鮮卑並來入朝帝令憲典邊事思為長久  
規憲上復緣邊諸郡幽并二州由是而定三十年憲上  
言宜封禪正三雍之禮中元元年從封泰山及帝崩憲  
受遺詔典喪禮是時藩王皆在京師自王莽篡亂舊典  
不存皇太子與東海王等雜止同席憲章無序憲乃正  
色橫劔殿階扶下諸王以明尊卑時藩國官屬出入宮  
省與百僚無別憲乃表奏謁者將護分止他縣諸王並  
令就邸惟朝晡入臨整禮儀嚴門衛內外肅然永平元



年封節鄉侯三年春考中山相薛脩事不實免其冬代  
竇融為衛尉八年代虞延行太尉事居府如真後遭母  
憂上疏乞身行喪禮顯宗不許遣使者為釋服賞賜恩  
寵甚渥熹內典宿衛外幹宰職正身立朝未嘗懈怠顯  
宗崩復典喪事再奉大行禮事脩舉肅宗即位進太傅  
錄尚書事擢諸子為郎吏者七人長子代給事黃門建  
初五年熹疾病帝親幸視及薨車駕往臨弔時年八十  
四諡曰正侯子代嗣官至越騎校尉永元中副行征西



將軍劉尚征羌坐事下獄疾病物故和帝憐之賜祕器  
錢布贈越騎校尉節鄉侯印綬子直嗣官至步兵校尉  
直卒子淑嗣無子國除

牟融字子優北海安邱人也少博學以大夏侯尚書教  
授門徒數百人名稱州里以司徒茂才為豐令視事三  
年縣無獄訟為州郡最司徒范遷薦融忠正公方經行  
純備宜在本朝并上其理狀永平五年入代鮑昱為司  
隸校尉多所舉正百僚敬憚之八年代包咸為大鴻臚



十一年代鮭陽鴻為大司農是時顯宗方勤萬機公卿數朝會每輒延謀政事判折獄訟融經明才高善論議朝廷皆服其能帝數嗟歎以為才堪宰相明年代伏恭為司空舉動方重甚得大臣節肅宗即位以融先朝名臣代趙憙為太尉與憙參錄尚書事建初四年薨車駕親臨其喪時融長子麟歸鄉里帝以其餘子幼弱勅太尉掾史教其威儀進止賻贈恩寵篤密焉又賜冢塋地於顯節陵下除麟為郎



韋彪字孟達扶風平陵人也高祖賢宣帝時為丞相祖  
賞哀帝時為大司馬彪孝行純至父母卒哀毀三年不  
出廬寢服竟羸瘠骨立異形醫療數年乃起博學洽聞  
雅稱儒宗建武末舉孝廉除郎中以病免復歸教授安  
貧樂道恬於進趣三輔諸儒莫不慕仰之顯宗聞彪名  
永平六年召拜謁者賜以車馬衣服三遷魏郡太守肅  
宗即位以病免徵為左中郎將長樂衛尉尉數陳政術每  
歸寬厚比上疏乞骸骨拜為奉車都尉秩中二千石賞



賜恩寵侔於親戚建初七年車駕西巡狩以彪行太常  
從數召入問以三輔舊事禮儀風俗彪因建言今西巡  
舊都宜追錄高祖中宗功臣褒顯先勲紀其子孫帝納  
之行至長安乃制詔京兆尹右扶風求蕭何霍光後時  
光無苗裔唯封何末孫熊為鄴侯建初二年已封曹參  
後曹湛為平陽侯故不復及焉乃厚賜彪錢珍羞食物  
使歸平陵上冢還拜大鴻臚是時陳事者多言郡國貢  
舉率非功次故守職益懈而吏事寢疏咎在州郡有詔



下公卿朝臣議彪上議曰夫國以簡賢為務賢以孝行為首孔子曰事親孝故忠可移於君是以求忠臣必於孝子之門夫人才行少能相兼是以孟公綽優於趙魏老不可以為滕薛大夫忠孝之人持心近厚三代之所以直道而行者在其所以磨之故也士宜以才行為先不可純以閥閱然其要歸在於選二千石二千石賢則貢舉皆得其人帝深納之彪以世承二帝吏化之後多以苛刻為能又置官選職不必以才因盛夏多寒上疏



諫曰臣聞政化之本必順陰陽伏見立夏以來當暑而寒殆以刑罰刻急郡國不奉時令之所致也農人急於務而苛吏奪其時賦發充常調而貪吏割其財此其巨患也夫欲急人所務當先除其所患天下樞要在於尚書尚書之選豈可不重而閒者多從郎官超升此位雖曉習文法長於應對然察察少慧類無大能宜簡常歷州宰素有名者雖進退舒遲時有不逮然端心向公奉職周密宜鑒嗇夫掎急之對深思絳侯木訥之功也往



時楚獄大起故置令史以助郎職而類多小人好為姦利今者務簡可皆停省又諫議之職應用公直之士通才謇正有補益於朝者今或從徵試輩為大夫又御史外遷動據州郡並宜清選其任責以言績其二千石視事雖久而為吏民所便安者宜增秩重賞勿妄遷徙惟留聖心書奏帝納之元和二年春東巡狩以彪行司徒事從行還以病乞身帝遣小黃門太醫問病賜以食物彪遂稱困篤章和二年夏使謁者策詔彪令上大鴻臚



印綬其遣太子舍人詣中藏府受賜錢二十萬永元元年卒詔復賜錢二十萬布百匹穀三千斛彪清儉好施祿賜分與宗族家無餘財著書十二篇號曰韋卿子彪族子義字季節高祖父元成元帝時為丞相初彪獨徙扶風故義猶為京兆杜陵人焉兄順字叔文平輿令有高名次兄豹字季明數辟公府輒以事去司徒劉愷復辟之謂曰卿以好去就爵位不躋今歲垂盡當選御史意在相薦子其宿留乎豹曰犬馬齒衰膂力已劣仰慕



宗恩故未能自割且眩瞀滯疾不堪久待選薦之私非  
所敢當遂趺而起愷追之徑去不顧安帝西巡徵拜議  
郎義少與二兄齊名初仕州郡太傅桓焉辟舉理劇為  
廣都長甘陵陳二縣令政甚有績官曹無事牢獄空虛  
數上書順帝陳宜依古典考功黜陟徵集名儒大定其  
制又譏切左右貶刺竇氏言既無感而久抑不遷以兄  
順喪去官比辟公府不就廣都為生立廟及卒三縣吏  
民為義舉哀若喪考妣豹子著字休明少以經術知名



不應州郡之命大將軍梁冀辟不就延熹二年桓帝公車備禮徵至霸陵稱病歸乃入雲陽山采藥不返有司舉奏加罪帝特原之復詔京兆尹重以禮敦勸著遂不就徵靈帝即位中常侍曹節以陳蕃竇氏既誅海內多怨欲借寵時賢以為名白帝就家拜著東海相詔書逼切不得已解巾之郡政任威刑為受罰者所奏坐論輸左校又後妻驕恣亂政以之失名竟歸為姦人所害隱者恥之



宣秉字巨公馮翊雲陽人也少修高節顯名三輔哀平  
際見王氏據權專政侵削宗室有逆亂萌遂隱遁深山  
州郡連召常寢疾不仕王莽為宰衡辟命不應及莽篡  
位又遣使者徵之秉固稱疾病更始即位徵為侍中建  
武元年拜御史中丞光武特詔御史中丞與司隸校尉  
尚書令會同並專席而坐故京師號曰三獨坐明年遷  
司隸校尉務舉大綱簡略苛細百僚敬之秉性節儉常  
服布被蔬食瓦器帝嘗幸其府舍見而嘆曰楚國二龔



不如雲陽宣巨公即賜布帛帷帳什物四年拜大司徒  
司直所得祿俸輒以收養親族其孤弱者分與田地自  
無儋石之儲六年卒官帝愍惜之除子彪為郎

張湛字子孝扶風平陵人也矜嚴好禮動止有則居處  
幽室必自修整雖遇妻子如嚴君焉及在鄉黨詳言正  
色三輔以為儀表人或謂湛偽詐湛聞而笑曰我誠詐  
也人皆詐惡我獨詐善不亦可乎成哀間為二千石王  
莽時歷太守都尉建武初為左馮翊在郡修典禮設教



條政化大行後告歸平陵望寺門而步主簿進曰明府位尊德重不宜自輕湛曰禮下公門式路馬孔子於鄉黨恂恂如也父母之國所宜盡禮何謂輕哉五年拜光祿勳光武臨朝或有惰容湛輒陳諫其失常乘白馬帝每見湛輒言白馬生且復諫矣七年以病乞身拜光祿大夫代王丹為太子太傅及郭后廢因稱疾不朝拜太中大夫居中東門候舍故時人號中東門君帝數存問賞賜後大司徒戴涉被誅帝彊起湛以代之湛至朝堂



遺失漕便因自陳疾篤不能復任朝事遂罷之數年卒於家

王丹字仲回京兆下邳人也哀平時仕州郡王莽時連徵不至家累千金隱居養志好施周急每歲農時輒載酒肴於田間候勤者而勞之其墮蠲者恥不致丹皆兼功自厲邑聚相率以致殷富其輕黠游蕩廢業為患者輒曉其父兄使黜責之没者則賻給親自將護其有遭喪憂者輒待丹為辦鄉鄰以為常行之十餘年其化大



沿風俗以篤丹資性方潔疾惡彊豪時河南太守同郡  
陳遵關西大俠也其友人喪親遵為護喪事賻助甚豐  
丹乃懷縑一匹陳之於主人前曰如丹此縑出自機杼  
遵聞而有慙色自以知名欲結交於丹丹拒而不許會  
前將軍鄧禹西征關中軍糧乏丹率宗族上麥二千斛  
禹表丹領左馮翊稱疾不視事免歸後徵為太子少傅  
時大司徒侯霸欲與交友及丹被徵遣子昱侯於道昱  
迎拜車下丹下答之昱曰家公欲與君結交何為見拜



丹曰君房有是言丹未之許也丹子有同門生喪親家  
在中山白丹欲往奔慰結侶將行丹怒而撻之令寄鱸  
以祠焉或問其故丹曰交道之難未易言也世稱管鮑  
次則王貢張陳凶其終蕭朱隙其末故知全之者鮮矣  
時人服其言客初有薦士於丹者因選舉之而後所舉  
者陷罪丹坐以免客慙懼自絕而丹終無所言尋復徵  
為太子太傅乃呼客謂曰子之自絕何量丹之薄也不  
為設食以罰之相待如舊其後遜位卒于家



王良字仲子東海蘭陵人也少好學習小夏侯尚書王莽世寢病不仕教授諸生千餘人建武二年大司馬吳漢辟不應三年徵拜諫議大夫數有忠言以禮進止朝廷敬之遷沛郡太守至蘄縣稱病不之府官屬皆隨就之良遂上疾篤乞骸骨徵拜太中大夫六年代宣秉為大司徒司直在位恭儉妻子不入官舍布被瓦器時司徒史鮑恢以事到東海過其家而良妻布裙曳柴從田中歸恢告曰我司徒史也故來受書欲見夫人妻曰妾



是也苦掾無書恢乃下拜嘆息而還聞者莫不嘉之後以病歸一歲復徵至滎陽疾篤不任進道過其友人友人不肯見曰不有忠言奇謀而取大位何其往來屑屑不憚煩也遂拒之良慙自後連徵輒稱病詔以元纁聘之遂不應後光武幸蘭陵遣使者問良所疾苦不能言對詔復其子孫邑中徭役卒於家

杜林字伯山扶風茂陵人也父鄴成哀間為涼州刺史林少好學沈深家既多書而外氏張竦父子喜文米林



從竦受學博洽多聞世稱通儒初為郡吏王莽敗盜賊起林與弟成及同郡范遂孟冀等將細弱俱客河西道逢賊數千人遂掠取財裝褫奪衣服拔刀向林欲殺之林曰願一言而死將軍知天神乎赤眉兵衆百萬所向無前而殘賊不道卒至破敗今將軍以數十之衆欲規霸王之事不行仁恩而反遵覆車不畏天乎賊遂釋之俱免於難隗囂聞林志節深相敬待以為持書平後因疾告去辭還祿食囂復欲令彊起遂稱篤囂意雖相望



且欲優容之乃出令曰杜伯山天子所不能臣諸侯所不能友蓋伯夷叔齊恥食周粟今且從師友之位須道開通使順所志林雖拘於囂終不屈節建武六年弟成物故囂乃聽林持喪東歸既遣而悔追令刺客楊賢於隴坻遮殺之賢見林身推鹿車載致弟喪乃嘆曰當今之世誰能行義我雖小人何忍殺義士因亡去光武聞林已歸三輔乃徵拜侍御史引見問以經書故舊及西州事甚悅之賜車馬衣被羣僚知林以名德用甚尊憚



之京師士大夫咸推其博洽河南鄭興東海衛宏等皆長於古學興嘗師事劉歆林既遇之欣然言曰林得興等固諧矣使宏得林且有以益之及宏見林闇然而服濟南徐巡始師事宏後皆更受林學林前於西州得漆書古文尚書一卷常寶愛之雖遭艱困握持不離身出以示宏等曰林流離兵亂常恐斯經將絕何意東海衛子濟南徐生復能傳之是道竟不墜於地矣古文雖不合時務然願諸生無悔所學宏巡益重之於是古文遂



行明年大議郊祀制多以為周郊后稷漢當祀堯詔復  
下公卿議議者僉同帝亦然之林獨以為周室之興祚  
由后稷漢業特起功不緣堯祖宗故事所宜因循乃定  
從林議後代王良為大司徒司直林薦同郡范逡趙秉  
申屠剛及隴西牛邯等皆被擢用士多歸之十一年司  
直官罷以林代郭憲為光祿勳內奉宿衛外總三署周  
密敬慎選舉稱平郎有好學者輒見誘進朝夕滿堂十  
四年羣臣上言古者肉刑嚴重則人畏法令今憲律輕



薄故姦軌不勝宜增科禁以防其源詔下公卿林奏曰  
夫人情挫辱則義節之風損法防繁多則苟免之行興  
孔子曰導之以政齊之以刑民免而無恥導之以德齊  
之以禮有恥且格古之明王深識遠慮動居其厚不務  
多辟周之五刑不過三千大漢初興詳覽失得故破矩  
為圓斲彫為樸蠲除苛政更立疏網海內歡欣人懷寬  
德及至其後漸以滋彰吹毛索疵詆欺無限果桃李茹  
之饋集以成臧小事無妨於義以為大戮故國無廉士



家無完行至於法不能禁令不能止上下相遁為敝彌  
深臣愚以為宜如舊制不合翻移帝從之後皇太子彊  
求乞自退封東海王故重選官屬以林為王傅從駕南  
巡狩時諸王傅數被引命或多交游不得應詔唯林守  
慎有召必至餘人雖不見譴而林特受賞賜又辭不敢  
受帝益重之明年代丁恭為少府二十二年復為光祿  
勳頃之代朱浮為大司空博雅多通稱為任職相明年  
薨帝親自臨喪送葬除子喬為郎又詔喬為丹水長



郭丹字少卿南陽穰人也父稚成帝時為廬江太守有清名丹七歲而孤小心孝順後母哀憐之為鬻衣裝買產業後從師於長安買符入函谷關乃慨然嘆曰丹不乘使者車終不出關既至京師常為都講諸儒咸敬重之大司馬嚴尤請丹辭病不就王莽又徵之遂與諸生逃於北地更始二年三公舉丹賢能徵為諫議大夫持節使歸南陽安集受降丹自去家十二年果乘高車出關如其志焉更始敗諸將悉歸光武並獲封爵丹獨保



平氏不下為更始發喪緣經盡哀建武二年遂潛逃去  
敝衣間行涉歷險阻求謁更始妻子奉還節傳因歸鄉  
里太守杜詩請為功曹丹薦鄉人長者自代而去詩乃  
歎曰昔明王興化卿士讓位功曹推賢可謂至德勅以  
丹事編署黃堂以為後法十三年大司馬吳漢辟舉高  
第再遷并州牧有清平稱轉使匈奴中郎將遷左馮翊  
永平三年代李訢為司徒在朝廉直公正與侯霸杜林  
張湛郭伋齊名相善明年坐考隴西太守鄧融事無所



據策免五年卒於家時年八十七以河南尹范遷有清  
行代為司徒遷字子廬沛國人初為漁陽太守以智略  
安邊匈奴不敢入界及在公輔有宅數畝田不過一頃  
又推與兄子其妻常謂曰君有四子而無立椎之地可  
餘奉祿以為後世業遷曰吾備位大臣而蓄財求利何  
以示後世在位四年薨家無儋石焉後顯宗因朝會問  
羣臣郭丹家今何如宗正劉匡對曰昔孫叔敖相楚馬  
不秣粟妻子不衣帛子孫竟蒙寢邱之封丹出典州郡



入為三公而家無遺產子孫困匱帝乃下南陽訪求其  
嗣長子字官至恒山太守少子濟趙相

吳良字大儀齊國臨淄人也初為郡吏歲旦與掾吏入  
賀門下掾王望舉觴上壽諂稱太守功德良於坐下勃  
然進曰望佞邪之人欺諂無狀願勿受其觴太守歛容  
而止讌罷轉良為功曹恥以言受進終不肯謁時驃騎  
將軍東平王蒼聞而辟之署為西曹蒼甚相敬愛上疏  
薦良經任博士行中儀表宜備宿衛以輔聖政書奏顯



宗以示公卿曰前以事見良髮鬚皓然衣冠甚偉夫薦賢助國宰相之職蕭何舉韓信設壇而拜不復考試今以良為議郎永平中車駕近出而信陽侯陰就干突禁衛車府令徐匡鈞就車收御者送獄詔書譴匡匡乃自繫良上言信陽侯就倚恃外戚干犯乘輿無人臣禮為大不敬匡執法守正反下于理臣恐聖化由是而弛帝雖赦匡猶左轉良為郎中長後遷司徒長史每處大議輒據經典不希旨偶俗以徼時譽後坐事免復拜議郎



卒於官

承宮字少子琅邪姑幕人也少孤年八歲為人牧豕鄉里徐子盛者以春秋經授諸生數百人宮過息廬下樂其業因就聽經遂請留門下為諸生拾薪執苦數年勤學不倦經典既明乃歸家教授遭天下喪亂遂將諸生避地漢中後與妻子之蒙陰山肆力耕種禾黍將熟人有認之者宮不與計推之而去由是顯名三府更辟皆不應永平中徵詣公車駕臨辟雍召宮拜博士遷左中



郎將數納忠言陳政論議切慤朝臣憚其節名播匈奴  
時北單于遣使求得見宮帝勅自整飾宮對曰夷狄眩  
名非識實者也臣狀醜不可以示遠宜選有威容者帝  
乃以大鴻臚魏應代之十七年拜侍中祭酒建初元年  
卒肅宗褒歎賜以冢地妻上書乞歸葬鄉里復賜錢三  
十萬

鄭均字仲虞東平任城人也少好黃老書兄為縣吏頗  
受禮遺均數諫止不聽即脫身為傭歲餘得錢帛歸以



與兄曰物盡可復得為吏坐臧終身捐棄兄感其言遂  
為廉潔均好義篤實養寡嫂收孤兒恩禮敦至常稱病  
家廷不應州郡辟召郡將欲必致之使縣令譎將詣門  
既至卒不能屈均於是客於濮陽建初三年司徒鮑昱  
辟之後舉直言並不詣六年公車特徵再遷尚書數納  
忠言肅宗敬重之後以病乞骸骨拜議郎告歸因稱疾  
篤帝賜以衣冠元和元年詔告廬江太守東平相賜均  
及前安邑令毛義穀各千斛常以八月長吏存問賜羊



酒明年帝東巡過任城乃幸均舍勅賜尚書祿以終其身故時人號為白衣尚書永元中卒於家

趙典字仲經蜀郡成都人也父戒為太尉桓帝立以定策封厨亭侯典少篤行隱約博學經書弟子自遠方至建和初四府表薦徵拜議郎侍講禁內再遷為侍中時帝欲廣開鴻池典諫曰鴻池汎漑已且百頃猶復增而深之非所以崇唐虞之約已遵孝文之愛人也帝納其言而止父卒襲封出為弘農太守轉右扶風公事去官



徵拜城門校尉轉將作大匠遷少府又轉大鴻臚時恩澤諸侯以無勞受封羣臣不悅而莫敢諫典獨奏曰夫無功而賞勞者不勸上忝下辱亂象干度且高祖之誓非功臣不封宜一切削免爵土以存舊典帝不從頃之轉太僕遷太常朝廷每有災異疑議輒諮問之典據經正對無所曲折每得賞賜輒與諸生之貧者後以諫諍違旨免官就國會帝崩時禁藩國諸侯不得奔弔典慨然曰身從衣褐之中致位上列且烏烏反哺報德況於



士邪遂解印綬符策付縣而馳到京師州郡及大鴻臚  
並執處其罪而公卿百僚嘉典之義表請以租自贖詔  
書許之再遷長樂少府衛尉公卿復表典篤學博聞宜  
備國師會病卒使者弔祠竇太后復遣使兼贈印綬諡  
曰獻侯典兄子謙謙弟溫相繼為三公謙字彥信初平  
元年代黃琬為太尉獻帝遷都長安以謙行車騎將軍  
為前置明年病罷復為司隸校尉車師王侍子為董卓  
所愛數犯法謙收殺之卓大怒殺都官從事而素敬憚



謙故不加罪轉為前將軍遣擊白波賊有功封郡侯李  
傽殺司徒王允復代允為司徒數月病免拜尚書令是  
年卒諡曰忠侯溫字子柔初為京兆郡丞歎曰大大夫  
當雄飛安能雌伏遂棄官去遭歲大飢散家糧以賑窮  
餓所活萬餘人獻帝西遷為侍中同輿輦至長安封江  
南亭侯代楊彪為司空免頃之復為司徒錄尚書事時  
李傽與郭汜相攻傽遂虜掠禁省劫帝幸北塢外內隔  
絕傽素疑溫不與已同乃內溫於塢中又欲移乘輿於



黃白城溫與催書曰公前託為董公報讐然實屠陷王城殺戮大臣天下不可家見而戶說也今與郭汜爭睚眦之隙以成千鈞之讐人在塗炭各不聊生曾不改悟遂成禍亂朝廷仍下明詔欲令和解上命不行威澤日損而復欲移轉乘輿更幸非所此誠老夫所不達也於易一為過再為涉三而弗改滅其項凶不如早共和解引軍還屯上安萬乘下全人民豈不幸甚催大怒欲遣人殺溫董卓從弟應溫故掾也諫之數日乃獲免溫從



車駕都許建安十三年以辟司空曹操子丕為掾操起奏溫辟忠臣子弟選舉不實免官是歲卒年七十二

桓譚字君山沛國相人也父成帝時為太樂令譚以父任為郎因好音律善鼓琴博學多通徧習五經皆訓詁大義不為章句能文章尤好古學數從劉歆揚雄辯析疑異性嗜倡樂簡易不修威儀而意非毀俗儒由是多見排抵音紙哀平間位不過郎傳皇后父孔鄉侯晏深善於譚是時高安侯董賢寵倖女弟為昭儀皇后日已疎



晏嘿嘿不得意譚進說曰昔武帝欲立衛子夫陰求陳  
皇后之過而陳后終廢子夫竟立今董賢至愛女弟尤  
幸殆將有子夫之變可不憂哉晏驚動曰為之奈何譚  
曰刑罰不能加無罪邪枉不能勝正人夫士以才智要  
君女以媚道求主皇后年少希更艱難或驅使醫巫外  
求方伎此不可不備又君侯以后父尊重而多通賓客  
必借以重勢貽致譏議不如謝遣門徒務執謙慙此修  
己正家避禍之道也晏曰善遂罷遣常客入白皇后如



譚所戒後賢果諷太醫令真欽使求傅氏罪過遂逮后弟侍中喜詔獄無所得乃解故傅氏終全於哀帝之時及董賢為大司馬聞譚名欲與之交譚先奏書於賢說以輔國保身之術賢不能用遂不與通當王莽居攝篡弑之際天下之士莫不競褒稱德美作符命以求容媚譚獨自守默然無言莽時為掌樂大夫更始立召拜太中大夫世祖即位徵待詔上書言事失旨不用後大司空宋弘薦譚拜議郎給事中因上疏陳時政所宜曰臣



聞國之廢興在於政事政事得失由乎輔佐賢明則俊士充朝而理合世務輔佐不明則論失時宜而舉多過事夫有國之君俱欲興化建善然而政道未理者其所謂賢者異也昔楚莊王問孫叔敖曰寡人未得所以為國是也叔敖曰國之有是衆所惡也恐王不能定也王曰不定獨在君亦在臣乎對曰君驕士曰士非我無從富貴士驕君曰君非士無從安存人君或至失國而不悟士或至飢寒而不進君臣不合則國是無從定矣莊



王曰善願相國與諸大夫共定國是也蓋善政者視俗而施教察失而立防威德更興文武迭用然後政調於時而躁人可定昔董仲舒言理國譬若琴瑟其不調者則改而更張夫更張難行而拂衆者亡是故賈誼以才逐而黷錯以智死世雖有殊能而終莫敢談者懼於前事也且設法禁者非能盡塞天下之姦皆合衆人之所欲也大抵取便國利事多者則可矣夫張官置吏以理萬民懸賞設罰以別善惡惡人誅傷則善人蒙福矣今



人相殺傷雖已伏法而私結怨讐子孫相報後忿深前  
至於滅戶殄業而俗稱豪傑故雖有怯弱猶勉而行之  
此為聽人自理而無復法禁者也今宜申明舊令若已  
伏官誅而私相傷殺者雖一身逃亡皆徙家屬於邊其  
相傷者加常二等不得雇山贖罪如此則仇怨自解盜  
賊息矣夫理國之道舉本業而抑末利是以先帝禁人  
二業錮商賈不得宦為吏此所以抑并兼長廉恥也今  
富商大賈多放田貸中家子弟為之保役趨走與臣僕



等勤收稅與封君比入是以衆人慕效不耕而食至乃  
多通侈靡以淫耳目今可令諸商賈自相糾告若非身  
力所得皆以臧畀告者如此則專役一已不敢以貨與  
人事寡力弱必歸功田畝田畝修則穀入多而地力盡  
矣又見法令決事輕重不齊或一事殊法同罪異論姦  
吏得因緣為市所欲活則出生議所欲陷則與死比是  
為刑開二門也今可令通義理明習法律者校定科比  
一其法度班下郡國蠲除故條如此則天下知方而獄



無怨濫矣書奏不省時帝方信讖多以決定嫌疑又醺  
賞少薄天下不時安定譚復上疏曰凡人情忽於見事  
而貴於異聞觀先王之所記述咸以仁義正道為本非  
有奇怪虛誕之事蓋天道性命聖人所難言也自子貢  
以下不得而聞况後世淺儒能通之乎今諸巧慧小才  
伎數之人增益圖書矯稱讖記以欺惑貪折誑誤人主  
焉可不抑遠之哉臣譚復聞陛下窮折方士黃白之術  
甚為明矣而乃欲聽納讖記又何疑也其事雖有時合




譬猶卜數隻偶之類陛下宜垂明聽發聖意屏羣小之  
曲說述五經之正義略嚚同之俗語詳通人之雅謀又  
臣聞安平則尊道術之士有難則貴介冑之臣今聖朝  
興復祖統為人臣主而四方盜賊未盡歸伏者此權謀  
未得也臣譚伏觀陛下用兵諸所降下既無重賞以相  
恩誘或至虜掠奪其財物由是兵長渠率各生狐疑黨  
輩連結歲月不解古人有言曰天下皆知取之為取莫  
知與之為取陛下誠能輕爵重賞與士共之則何招而



不至何說而不釋何向而不開何征而不克如此則能以狹為廣以遲為速亡者復存失者復得矣帝省奏愈不悅其後有詔會議靈臺所處帝謂譚曰吾欲以讖決之何如譚嘿然良久曰臣不讀讖帝問其故譚復極言讖之非經帝大怒曰桓譚非聖無法將下斬之叩頭流血良久乃得解出為六安郡丞意忽忽不樂道病卒時年七十餘初譚著書言當世行事二十九篇號曰新論上書獻之光武善焉琴道一篇未成肅宗使班固續成



之所著賦誄書奏凡二十六篇元和中肅宗東巡至沛  
使使者祠譚冢鄉里以為榮





通志卷一百七上